

12/04/2001

Konvensyen PKS di Kota Bharu

DEWAN Perniagaan Melayu Malaysia Negeri Kelantan (DPMMNK) akan menganjurkan Konvensyen Perusahaan Kecil dan Sederhana (PKS) yang terbesar di negeri ini, pada 25 hingga 28 Mei depan, di Kota Bharu.

Konvensyen empat hari bertajuk Persediaan Ke Arah Perdagangan Global Menjelang Afta 2003 itu dijangka dirasmikan Perdana Menteri, Datuk Seri Dr Mahathir Mohamad.

Dianggarkan antara 400 hingga 500 peserta, terdiri daripada usahawan PKS tempatan dan dari negara Asean seperti Indonesia, Thailand dan Brunei akan menyertainya.

Yang Dipertua DPMMNK, Nik Abdul Rahman Nik Taib, berkata antara lain langkah dewan menganjurkan konvensyen yang disifatkan terbesar peringkat negeri Kelantan sebagai persediaan awal bagi usahawan PKS tempatan menghadapi suasana pasaran bebas apabila Kawasan Perdagangan Bebas Asean (Afta) bermula pada 2003.

"Menerusi konvensyen itu diharapkan menjadi pemangkin kepada usahawan PKS supaya berfikiran lebih jauh dalam era globalisasi di samping mencari idea baru ke arah meningkatkan produk masing-masing yang mampu berdaya saing dalam pasaran Afta," katanya pada sidang akhbar, di Kota Bharu, semalam.

Nik Abdul Rahman berkata, antara kumpulan usahawan akan menyertai konvensyen itu selain usahawan tempatan, Sabah dan Sarawak turut sama membabitkan peserta yang juga rakan dagangan negara Asean.

Kumpulan lain yang dijangka turut serta peawai agensi kerajaan, eksekutif sektor swasta dan pembuat polisi seperti daripada Kementerian Kewangan dan Bank Negara Malaysia (BNM).

(END)